

14 JUL 1998

AGONG DAN PM UCAP TAHNIAH ULANG TAHUN KEPUTERAAN SULTAN BRUNEI

KUALA LUMPUR, 14 Julai (Bernama) -- Yang di-Pertuan Agong Tuanku Ja'afar hari ini mengutus ucapan tahniah kepada Sultan Brunei, Sultan Hassanal Bolkiah sempena ulang tahun hari keputeraan Baginda.

Tuanku Ja'afar dan Raja Permaisuri Agong Tuanku Najihah berdoa semoga Sultan Hassanal Bolkiah sentiasa dilimpahi rahmat, sihat serta berada dalam kesejahteraan untuk terus memimpin rakyat Brunei ke arah peningkatan kemajuan dan kemakmuran yang berpanjangan.

Seri Paduka yakin Brunei akan terus maju dan makmur di bawah kebijaksanaan pemerintahan Sultan Hassanal Bolkiah, menurut kenyataan yang dikeluarkan Wisma Putra di sini hari ini.

Perdana Menteri Datuk Seri Dr Mahathir Mohamad turut mengutus ucapan yang serupa dan berdoa semoga Sultan Brunei sentiasa dilindungi Allah serta beroleh kesejahteraan dan kebahagiaan.

Dr Mahathir berharap persahabatan di antara rakyat Malaysia dan Brunei akan terus kekal dan bertambah erat.

Beliau juga yakin kerjasama kedua-dua negara dapat dipertingkatkan untuk kebaikan dan kesejahteraan rakyat kedua-dua negara.

-- BERNAMA

HS NMO